



Sujet Stammverein Rotstab-Clique Liestal Fasnecht 2015

«Konfettiräge-Challenge:
Alli Narre mache mit,
wieso wüsse sii aber nid!»

«Sali zäme, Tobler Willi.
Bi Baselbieter Hilly Billy.
Ich ha do geschter unerwaartet
E super tolli Challenge gstaartet.

Mi Muni het dr Seckelbisser
Und derzue dr gruusigscht Schisser.
Die Chranket die häisst LSD:
«Lüüs am Sack und Därmliwee».

Nit nur bim «Karli» isch's extrem.
Wältwyt git's das Phänomen.
Fascht in jedem fünfte Stall
Gits e son e Chranketsfall.

Drum mach vo dir jetzt au e Clip
Und mach die Challenge superhip:
Duesch Munichlütter in e Becki
Und knallsch's an dyni Woonigsdecki.»

E jeede Joggel cha esoo
E riise Blödsinn useloo.
Für jeede chlynschte Hasefuurz
Dräisch e Filmlü knapp und chuurz.

Und gäb's nüt schlimmers zum beklage,
Duet äi Clip grad dr ander jaage.
Käi Hirnschmalz wird do inveschiert
Und sone Bullshit boykottiert.

Het's am Aafang guet sy selle,
Zum's dr ganze Wält verzelle,
Wird's denn, chum hesch's du nit gsee,
Ohni Sinn meh wytergeh.

Und statt me denn würd würlklich spände,
Duesch s'pro ego umverwände.
E Muskel dört, e Fuudi doo!
Dr Challenge-Zwäck wird nüm vernoo!!

Und ooni äinisch wyter z danke,
Duet mäng'e öis sys Filmlü «schänke».
E Jede Daag wird ooni Hemmig
Die Clipfluet zun're Überschwemmig.

Es isch scho krass, was äine hütte
Vo sich im Netz duet aaneschütte.
«Ha grad gschloofe, ha grad gässe.
Und d'Längi vom mym Schnäabi gmässe.»

Und prompt hallts usem Internet:
«Di Noochricht findi äifach fett.
I miss au grad mi chlyyne Peter:
Isch stolzi siibe Zentimeter.»

Wüdsch d'Gschicht vom Narciss hütte brichte:
Sy Blick wär uf käi Tümpel z'richte.
Statt däm chlät är am Bildschirm draa
Und luegt sy Facebook-Konto aa.

Me häisst die Medie SO-ZI-AL,
Doch oft sy die e räini Quaal.
Für jede Chaabis git's Support.
Es isch doch oft e Nonsense-Hort.

Die wo vorem PC sitze,
Gsehn chum zur iire Nasespitze.
Als öb das nit sy Würlkig hätt,
Häi vill no voorem Chopf e Brätt.

Wie hirverbrennti Marionette,
Im Glychschrift und au no in Chette,
Singe alli schön uf Zack
Dr Abgsang uf dr gueti Gschmack.

Statt ständig nur am Stumpfsinn fröone
Chönnts ebe au mit Pfiff ertöone.
E guete Spruch mit Woored draa
Chunnt insgesamt vill besser aa.

E super Bank, e gschliffne Räum
Nimmt mäng'e lachend mit sich häim.
E Spruch wo sitzt, e schöne Helge
Laaden y zum spöoter schwelge.

Ou Frau Fasnecht s'isch doch woor:
Guet chunnsch du in jeedem Joor.
Mit Pepp und mit're guete Zunge
Isch dir scho mäng'i Pointe glunge.

E ballti Laadig gspitzte Witz.
Fascht s'beschte wo's do je het's git's.
Décharge wird denn do ertält.
Groosszügig dr Applaus vertält.

Drum wäg vom Laptop, wäg wie nüt!
Uf d Strooss! An d Fasnecht liebi Lüt!
E churzi Zyt zum Narre syy...
... mir hoffe diir syt au derbyy!

